

四庫全書

集部

欽定四庫全書

集部
龜穀集卷二

詳校官左中允_臣瑋五珠

主事_臣呂雲棟覆勘

總校官編修_臣王燕緒

校對官中書_臣吳俊

謄錄監生_臣楊兆豐

欽定四庫全書

集部四

龜溪集

別集類三 宋

提要

臣等謹案龜溪集十二卷宋沈與求撰與求

字必先德清人政和五年進士高宗時官至
知樞密院事卒謚忠敏事跡具宋史本傳是
集為紹熙中其孫說所刊史稱與求歷御史
三院知無不言前後幾四百奏其言切直今

所存僅十之三四類多深中時弊陳振孫書
錄解題曰與求嘗奏王安石之罪大者在於
取揚雄馮道當時學者惟知有安石喪亂之
際甘心從偽無仗節死義之風實安石倡之
此論前未之及也云云考熙寧以逮政和王
蔡諸人以權勢奔走天下誅鋤善類引掖宵
人其夤緣以苟富貴者本無廉恥之心又安
能望以名節之事其偷生賣國實積漸使然

不必盡由於推獎揚雄表章馮道與求此奏
亦事後推索之詞然其說主持風教振刷綱
常要不可不謂之偉論也至其制誥諸篇典
雅舂容亦具有唐人軌度又不徒以奏議見
長矣乾隆四十六年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

龜谿集卷一

宋 沈與求 撰

古詩

山西行

山西健兒好身手氣如車輪膽如斗十五射獵少年場
戲格黃鵠同拉朽二十竄名尺籍中鐵馬追風快馳走
臂弓腰箭了一生只喜論攻不論守兵符夜半出轅門
將軍令肅誰敢後自誇豪傑天下無誓為官家掃羣醜

蠻夷共事古來危監軍巧落他人機黑山未靖黃河沸
邊塵倏忽連紫微長驅中州斥候絕已聞飲馬金明池
种家猛將忠貫日髮上衝冠願指揮主辱偷生事不武
壯士裂眦爭相隨東跨潼關達上國城頭夜挿將軍旗
諸軍下馬拜吾父請成退舍纔有期肉食謀國帝子質
勒兵不動護送之壯士束手猛將死敵來侮人猶小兒
明明二聖堯舜主天翻地坼徒爾為天翻地坼徒爾為
北望血淚滂兩頤真人中興似光武赤眉青犢折華笞

一呼奮擊肯效死風鶴尚信驚王師嗚呼何為背征討

紅帕

莫轄切

兜鍪半為盜東家昨夜虜小姑西婦朝逢握

刀笑錦衣玉食事奢侈翠眉紅頰資彊暴黃屋今懷肝
食憂忍與豺狼活蓬藿時危宜爾悍且驕側耳試聽哀
痛詔五陵佳氣自葱葱為雪大讐安九廟

次韻劉殿院贈錢圃翁

少日從畦丁頗悟園官理松韭記春秋蔬食聊爾耳十
年困塵埃幽事同脫屣一飽不可謀清瘦只如此仰止

長城翁趣尚兩奇偉弱冠事筆耕俛仰行六紀晚以圃
自娛扶鋤寄深喜柔風蔬甲怒細雨蘭芽美小摘定可
供餘事不掛齒那復肯着屐而一到城市為計一何疎
行須傳高士木茹忌太潔肉食忌太鄙安得從公游遠
傲於陵子

遊玲瓏山因訪朱氏草堂

平生丘壑心餘事不掛目藜杖南山來要使富幽矚異
哉小玲瓏蟠峙蒼弁腹修藤結懸崖飛溜響空曲伏石

卧虎狀騰拏雜奔鹿砮然互吞吐側路劣容足拂拭古
薛紋字刻翳新綠標榜玲瓏名奇怪殆天屬捫蘿上絕
頂坦坦類平陸俯首瞰來蹤穹然在幽谷傳聞昔逋客
誅茅此營屋清魂不可招千載想遺躅我思造物巧妙
供幽人祿揮斤役山祗斲此一拳玉雲牕與霧閣一一
相亘屬豈無部曲衆猿鶴即更僕豈無節旄貴松檜自
張纛此事久棄置蛛絲網巖麓翩翩佳公子心古韻不
俗駕言脫華簪茲焉卜幽築終日面巔岼世故豈容觸

指點空洞姿喜氣政堪掬挾策校昔游健步念須續亦有招隱詩薄暮不可讀

奉陪安守登撫原觀

江南多佳山駢首闕城郭緬懷在坦夷要使一見廓邦侯王事餘幽致到丘壑散策占城陰含睥及民瘼愛此郊原平撫撫富耕穫飛觀儵下臨丹碧盪霄堦野色四座浮胷次潛領畧千畦雲弄黃歲事初不惡斗酒行勞農歡謠入酺醵勝地惡發揮波神覆為虐蕭辰誰與娛

一笑寄華酌落日耀旂輕颺漾簾幕卷白起壽公歌
聲渺林薄老農止勿狂嗣歲有真約

觀網魚

暗雨垂垂梅欲黃春山吐源春漲狂雪鱗頰尾汴流上
吹濤噴浪能奔忙魚師布網名白大萬目井井連重綱
聯艘絕流勢甚武遮羅初若無留藏大魚已得小魚棄
要使遺育充陂塘鰓鰕安用誤回避鰕蟹亦復虛跳梁
寧知不比綸索手欲以巧餌空滄浪

子修步屨相過屬疾不能倒屣戲贈

簿書日在手佳思挽不留而能痛撥置時來訪清幽古
木占城陰一曲縈寒流落影挿清泚綠蔭亦已稠結亭
坐蟠石傲兀忘拘囚雄談功名外俊氣橫九州事故未
應爾長恐坐阻修造物小兒相妒我得暫休河魚竟中
潰午枕猶扶頭雙鳬飛鳥聲歷歷過牆陬此興豈復淺
何當起從游試令開丈室子能問疾不

寄題溜川王景發肯構堂

深林藝松栢不數櫟與檇坐待十畝陰等為匠氏儲寧
復知種德責報不厭徐名令後必大善積慶有餘於焉
望豐屋政可增修閭王孫世東州奕奕盈簪裾金埒通
里巷珠樹連堦除賢哉景發甫爽爽衆莫如直氣薄霄
漢妙語鏘瓊琚定知磊落人一見懷抱攄謂我架華堂
映發先人廬揭名取肯構蓋念經營初堂前植桃李堂
上羅詩書桃李意取適詩書計非疎諸郎自蘭玉舌耕
起菑畬吾詩以為箴會見聯高車

何子楚為范明倫賦九疑石石吾不及見也讀
詩可以知其巔岼秀峙之狀吾累卜峰石為
小寒林興寄不淺用其韻并及之

峩弁千峰倚天碧上有修筠材可遂月明三弄面巉巖
驚起哀猿啼峭壁兒童斲石攢青瑤寒林蕭蕭吹墮樵
坐令結習落幽夢芒鞋竹杖歸路遙覺來隻影徒相守
哦子清詩筆如口眼中何必小玲瓏仿佛九疑當戶牖
神丹已失大江濬誰與安期追後塵分天隔日不可到

使我目斷蒼梧雲

次韻題沈傳曜瘦節堂

平生一字不療饑誰云稊覈能瓠肥牙籤玉筋五鼎食
是中有趣非錢癡萬事顛倒絕可嗤此腹却受將軍譏
吾宗酷似騎曹掾俗物紛紜那復看眼中但有瀟洒侯
高節亭亭真老伴山澤形容坐一癯相要檢校還丹書
食薇飲水笑多事知君此計誠非疎

劉行簡見借詩稿以長句歸之

文章偏忌聲名早富貴政須門第好了知二物不相關
風月膏粱兼者少劉郎天韻真不凡飛騰宜在蓬萊島
年來窮愁已到骨只有珠璣落殘稿紛紛餘子何能追
定向詩壇分六纛造物小兒亦薄相浪付繁華給揮掃
却令徑坐詩人窮只與清冷消熱惱向來狗監非同邑
渴盡文園尚傭保九原千古忽可作如君自是不枯槁
茅齋夜誦誰得聞咄咄空能訴穹昊請君更作昇天行
勿使貧人彊知寶

送章文虎秀才歸荆南

我生本吳儂，搦筆追楚些。佳人脫塵屣，幽韻恥獨和。君
家楚江湄，詞語亦頓挫。學海富探討，渠數百紙過。春風
歸鳳城，櫺具恰解馱。此地初識君，細語輒三賀。冉冉歲
已邁，雲山憶高卧。翩然理歸裝，餘事等棄唾。文園久堅
壁，定恐一戰破。行矣儻復來，憑將楚詞課。

次韻曾守懷玲瓏山

泉石有膏肓，料理費和緩。風埃客子游，夢想略相半。端

如饜羊酪投七念鄉饌懷哉小玲瓏舊賞記酣宴玉女
下雲牕輕我年未冠誅茅老三間此意已懸斷少須草
堂資兩足那可絆謝公愛東山自結尋幽伴詩筒忽相
先紙價豈容賤流傳從使君感此歸思亂擷蘭躡危根
漱石俯長礪野性等麋鹿百嗜寧食薦攬衣中夜興測
漏疾流盼扁步愧駕筋卑飛傷短翰正使屐齒折未救
斧柯爛時節脫復徂遲莫空浩歎何當脂下澤去路鬱
交貫

何亭老築堂里第榜曰安虛蓋取司馬子微不
受外不逐外之說屬某賦詩以見意云

幻境如羣狙喜怒眩名實憐渠千劫迷墮此一念失世
路波濤翻時事風雨疾胡為隨物遷坐此方寸室使君
超世姿軒裳起儒術神交赤城仙妙解窮隱密向來心
泰然初不計升黜危堂榜新顏要以名自律牕扉敞深
明空華亂初日變滅驚須臾蔽虧隔纖悉了知內觀融
天光發虛室山林猿鶴儔廊廟鵷鸞匹靜躁塗或殊出

處心本一清都五城開真仙羅輔弼行矣朝紫皇啟沃
造前膝功名戲劇成志願談笑畢它年容買鄰儻不傲
蓬華

次韻何子楚食櫻桃

輕衫駿馬飛彈丸上林花開紛繡團御厨賜筍未解籜

山櫻亦復登金盤

櫻筍厨事見
秦中歲時記

宗廟薦新勤玉路凡果

紛紛不論數風清日美雨絲收朱實烘春燃綠樹筠籠

採擷價萬錢北人羊酪雅所便自從燕罷曲江曲

故事
進士

賜櫻
桃宴

五湖十載身回旋已作孤蓬任流轉萬顆徒勞野
人獻故無清夢大明宮醉倚酡顏浮玉盃

擬古

日月雙高懸朝昏自升沈有如轉轆轤引絙環相尋而
我生其間所閱幾古今爾來三十年又作裘氏吟眠飯
寄編簡此身疑白蟬皇皇走四方誰是真知音語欲離
舌本退縮翻如瘖涉世聊爾耳依阿亦何心託質既已
迂自謂百鍊金恥作渭水鈎寧為太阿鐔用捨安所之

齒髮忽已侵日月不我留潸然涕盈襟

次韻黃子虛同飲葛次顏家釀玉友

先生早年忘掃白嬾飯青精借顏色獨餘驪伯為友朋
熟不暇芻巾自漑何須引泉連百井飲若長虹太豪猛
細斟玉筯滑無聲酌我應憐官獨冷奇篇更寫陟釐黃
逼人心地生清涼了知二事盡家法眼饒徑索銀瓶嘗
我老華池少滋液年來愛酒如偷蜜陶然一醉樂未央
此外要知俱長物相期徑造君勿違坐得名勝從忘歸

公侯似聞勸設醴穆生正恐同分攜

次韻李元叔田邦鎮唱酬之什

李侯少年真自喜收名擬擅東南美大科異等不作難
堂堂奏賦明光裏眼看斗粟飽侏儒空腸殷雷歸著書
胷中未減食牛氣出手一擲當成廬只今聊問復何如

李比
入館

要辨蟬蠹資軒渠刺頭文字亦瑣碎澤叻快意回

焦枯

大雅寂寥誰發喜逆折波瀾須子美晚分一派大江西

約束曹劉歸句裏武安耳孫有臞儒載行無多一束書
褰驢破帽踏城市腰間蒯緱鳴湛盧叫閤自薦久未偶
淮南叢桂猶關渠雕鐫戲出鄉學餘掩面笑余詩并枯
讀成士穀詩卷和其書事一章

長年賦子虛狗監絕同里枯水聊自酬博此一笑喜副
墨粲我前頰使百廢起朱絃渺遺音慎勿娛俗耳論交
儻自今相從期暮齒

錢塘賦水母

疾風吹雨回江城，觜牙嘔啞潮欲平。
客居喜無人事撓，相與環坐臨前楹。
眼中水怪狀莫名，出沒沙觜如浮嬰。
復如緇笠絕兩纓，渾沌七竅俱未形。
塊然背負羣鰕行，嗟其巧以怪自呈。
凝目懷視相將迎，老漁旁睨笑發聲。
曰：此水母官，何驚江流如奔絕？
滄瀛潮汐往來月為程，藏納衆污無滿盈。
浮埃沈滓溷九清，結成此物宜昏盲。
使鰕導迷作雙睛，乃能接迹蚌與蛭。
亦猶巨蛭二體并，離則無目為光精。
江天八月霜葉鳴，吾師得鰕供水征。

水母奔擲羅縱橫試令收拾輸庖丁絳磬收涎體紆紫
飛刀鏤切武火烹花甕飮餽粲白英不殊冰盤堆水晶
稻醯醢寒芼香橙入齒已復能解醒遣漁止矣勿復評
嗟哉此性愚不更定矜故態招三彭且摩枵腹甘藜羹
泛舟村落阻風不能少進而菱梢芡嘴繚舷上

下篙人病之

艇子掠岸行水瘦不濡尾狂飈振疎篷獵獵鳴兩耳十
篙八九褪逆勢何乃爾野芡伺吾間回梢哆利嘴亦有

芰浮角一一肆輕鄙初欲事幽尋解纜出疎葦乘流瓦
清淺濯纓助深喜事有大不然移頃未離咫安得望蓬
萊巨艦破潮起征帆駕長風一日三萬里

夜坐感事

沈沈夜氣歸虛堂閉深寂孤燈爇餘花寒雷韻殘滴醞
釀萬斛愁感槩一人敵何當棄短檠陰山叱鳴鏑

戊申初寒偶作

去年十月冬猶溫單衣曉出錢塘門攜孥僅脫餓虎口

更吟楚些招驚魂兒女爭從亂離苦
咿啞遶膝多語言
舟行畏塗侵夜泊孤燈明滅何處村
蕭蕭細雨疎葦響
風力漸搖枯柳根失聲號寒泣龍具
促擢傍險爭前奔
還家依然四壁立故衾敗絮那忍論
無衣豈暇具裘褐
海圖坼裂波濤翻天公戲人亦太虐
雪花徑尺連上元
今年十月事羈宦兩脚如舊身
幸存紙牕寂歷風竹嘯
古木中夜號空園旅人不眠毛骨冷
撫事念往多煩冤
吾儕小人不論數豺狼滿目哀王孫
似聞易水寒墮指

北望大漠烟雲昏安得壯士馭八駿沙蟲猿鶴俱騰騫
歸歟莫如中土樂天子孝友朝廷尊坐令鐵衣掃蟣蝨
四海挾纊懷君恩

十里巖石壁

巨靈手擘青瑤璞平削無痕看斧鑿六丁取將天路遙
雷電收威半空落至今峯律橫道旁絕壁萬仞青茫茫
倚天屹立不可近下視培塿如羣羊鮮花爛斑風雨潰
藤梢夭矯蛟龍戲中開微竇走鳴泉白虹吞吐涵秋氣

泉流萬古潭水深山寒無風鬱沈沈下田納納禾稼茂
發源沾溉初何心峭直誰令據當路松柏蕭森半烟霧猶
恐夜深魑魅驚更遣山靈謹呵護

夜書山驛

天寒夜向闌月出山更靜風露搖青空萬象光耿耿啼
螢泣幽草賓鴻度前嶺歸來坐孤牕松竹舞清影

績溪寨口

青嶂挿天塹白水翻地軸回環壯哉縣不許飛鳥觸往

年羽書馳盜發清溪曲先聲雜妖幻餘黨萃符祝控攘
最旁近被害良慘毒聚落燼烟空生齒塗炭酷豈無山
川險會有法令東百年不用武駢領甘此辱至今風雨
夜猶聞鬼羣哭遺俗感舊憤禦盜勇氣足大兒佩刀劍
小兒利鋒鏃老翁筋力衰奮挺怒張目營寨人自戍不
待官期促矧今殺氣橫洒涕國步蹙豺狼據道路虎兇
出林谷儻持復讎心公戰圖報國

聞招寇

綠林煽餘習無乃國計左誨盜爵秩崇納叛金繒夥戢
姦在斧鉞賞誘詎云可萌芽緩誅鋤猖披費結裏戰多
數招安奚用腰箭苛悍兵昔已然黠將近亦頗昌言假
報國涅面刺投火豺狼奮哮噬逢螽蟴利掀簸橫行入通
邑焚掠窮委瑣況聞南陵寇執事初意情出沒勢已張
翦滅計未果宣城俯百里千室盡奔殫王事吾有程馬
頭戴印顆叱馭疾其驅語言紛炙輒何當說罷貅一洗
根本禍

寧國道中

山石聲確行路難山風蕭蕭吹早寒十步九歇僕馬瘁
兔蹊鳥道窮躋攀崖谷空籠瀑泉走碎玉零亂飛前灘
石堤捍水幾百級落處疑有蛟龍盤兩山之側開畎畝
石罅著鋤那得寬前村後村烟火冷土牆茅蓋常掩關
我行不知記近遠官游歲晚良自歎豈如家家一飽外
鷄豚社酒相追歡那知亦有簡書畏里胥剥啄驚衰顏
夜宿千秋嶺下田家

陰壑來悲風薄莫吹急雨冥冥攬寒色咫尺暗山路茅
簷兩三家曲澗縈竹塢停車且問訊欲止此何許老翁
行步弱扶杖倚門戶問我官何忙野宿今無所向夜號
狐狸深林嘯豺虎甘心在擇肉闖首輒憑怒駕言往何
之一榻翁敢拒延我傍中堂慙慙慰良苦解衣土銕旁
支枕憊行旅昏然飽安眼境寂絕猜怖雞聲報明發征
車犯寒去呼燈別老翁鼻息方栩栩

溪上見梅

晴溪漲淥如陰苔晴山插影相低回畫船疊鼓順流下
波光浩蕩征帆開灘縈岸繚拖牙轉水石相激如奔雷
須臾已復過絕壁歸路漸近嚴陵臺山重溪複境彌迴
暗香忽自空中來日斜正見叢棘外炯炯疎片飄寒梅
槎牙一種獨愁絕含情不語明巖隈凌波疑是水仙出
綃衣素質行徘徊下窺清淺一笑粲坐使凡卉俱塵埃
山谷之儒已臞甚龜腸鶴骨世所哈相逢頓覺百憂釋
不嫁春風誰與媒舟行易遠空回首角聲吹夢心悠哉

次韻張仲宗感事

諸侯救周衰能事存筆削後學競專門膚引迷注脚寧
知懼賊亂誅意未為虐上皇志包荒大度示恢廓誤墮
敵計中九廟施箭鏐將臣擁彊兵首鼠事前卻專雄懷
顧望散黨失歸着坐令兩宮車北轅狩沙漠天王紹絕
統憤此國勢弱嘗膽復大讎此意良不薄向來督真姦
國典猶閭略羣公爭護前循習久彌確黃屋泛滄溟黔
首寄矰繳世無管夷吾老眼雙淚閣何當誅賞行浩歎

成嗚噓曜靈還中天冰雪自銷鑠

次韻允迪祕監同年所寄會稽唱酬之什

秋鴻度寥廓天遠勞目送燕雀各有謀墮此朝餽供平生江海游往事恍如夢簪裳彊結裏翰墨困嘲弄一官冗不治匹馬旁無從迷行落小劫直意識大洞似聞脯麒麟頗欲翳鸞鳳眼無行祕書此語誰與共貧知世路艱老覺交情重功名等戲劇射覆偶微中龍媒駕鼓車款段朱絲鞵南游探禹穴聊得登覽縱時危要奇策塗

窮勿長慟相期論少卑材大古難用

鄭維心約趙安道中大家兄次律學士及僕探

梅城山乘月泛舟而歸

窮居不厭車馬絕委巷衡門常晝閉朝來剝啄誰過予
倒屣逢迎走驚蹶里中勝士真可人為憶寒梅耿殘雪
招呼聞早探幽芳平溪徑遣扁舟截西山佳處雲塢深
松竹蕭森迷洞穴上方小閣鏤空明開牕下見千山列
畫手無人貌平遠野闊天多供一瞥冰花只作小寒枝

拄杖不辭穿戲薛野僧省事畏客狂攀援自向南枝折
疎香低入坐中來骨冷肌清伴高潔襟期況有公子賢
伯也雄豪負奇節手拈凍蘂薦深括妙語琅琅契禪悅
人間此會不多有忍放杯空成小別歸來懷抱與誰論
一櫂翻然載明月

臘月二十六夜大雪投曉霽色恍然鳥語啁啾
便有春意感而賦之

黃昏雪打牕夜雨破幽夢晨光逗簷花霽色晃池凍老

木驚向榮好鳥發微哢草根露纖芒蟲聲試羣哄空畦
土勻酥側澗泉流渾臘盡殺氣哀春歸生理共人情自
多端天意皆曲中懸知造物公未厭萌區衆艱難重時
節俯仰疲迎送心閒數造化骨寒遭鬼弄那驚梅柳新
但飽藜藿供行須過田家泥飲空社甕

次韻葛魯卿送示近作一通二首

八騶盡屏如縈策微步招尋老賓客離離草色亂溝塍
脚底春風隨蠟屐蟄龍昨夜起洄潭忽雷閃電飛千巖

朝來遺珠落懷袖復見國風歌二南公洗膏肓砭傳癖
詞伯儒宗蚤揚歷詩成聊復貯錦囊副在久應藏石室
只今漂泊客烟村高哦七字哀王孫有如此言公不食

東山那得留安石

公詩慨然有濟世之志

君侯胷次多籌策歲晚翻為江海客小隱方營一把茅

公詩為結屋景山而作

幽尋定費幾兩屐公心落月印寒潭出濟

巨川歸築巖追還正始遊戲事聊為風騷作指南我有
幽憂如酒癖起誦君詩春寂歷天公下取氣凌雲神物

護持光滿室老矣懷歸封上村倚公佳句譜桐孫須公
拯危紓旰食快馮車攻刊樂石

葛魯卿再和復用前韻奉酬

上謁軍門宜杖策誰為兵家分主客猛將翻乘下瀨船
幽人退整登山屐山泉聞似百花潭山曲盤回十里巖
丘壑夔龍入太息那將捷徑比終南吾邦舊事論三癖

見劉夢得與湖州崔員外詩

佳處還堪記遊歷深譏表餌誤朝廷急

贊丞嘗安廟室避地來居水遶村鳬鷺哺子竹生孫苜

藉堆盤從野食人愛當年二千石

平生自媿無奇策魔去徑須呼逐客兀身聊欲避風塵
作意何能分履屐驚魚畏網伏深潭窮猿失木號重巖
殺氣漲天消息斷但想滄海浮東南囊無一錢銷錢癖
鮭菜醒人今齒歷忍言走馬過章臺空駭祝鷄餘土室
傖父嗔儂語帶村錦心繡口拜天孫端為遠謀箴肉食
誰能饒舌攻牢石

葛魯卿再和復用前韻奉酬

聞公卜居問龜策隱屏畏人呼重客閒招溪友鐵頭航
戲躡鄰娃金齒屐舍旁修木陰風潭坐有郎君掣電巖
已將此段慰偏仄更為岑參來蒼南細說當年陳類癖
類癖類
釋為癖伏閣忿爭書日歷國醫袖手藥籠空掛壁猶餘
弓矢室吾州萬落與千村以葛名兒浸及孫剗羊擊豕
作寒食定恐酌公忘斗石

小檻觀魚呼策策來伴漁蠻作逋客風回別浦有飛帆
雨濕斷堤無響屐夢回春到放龜潭潭上雜花開石巖

十椽老屋烟燼滅越鳥無日忘巢南空說花驄酬馬癖
豈有過都如塊歷出門咫尺行路難只辦蒼黃問家室
敲聲聲動何處村爭挽神器歸王孫今者不樂憤忘食
奮臂擬關弓五石

奉題思上人妙峰堂

上人游四方雲水渺長道一言契深心百法從此了十
年歸故山不踏山前草經營妙峰堂想像德雲老閉關
習跏趺宴坐兀枯槁混迹雖寰中寄意已塵表深枝婉

巖花雅音喧谷鳥翠竹伴幽禪白蓮敷衆好山空有雲
歸地淨無塵掃回觀第一義湛湛孤月皎法門有等差
問訊今誰曉躍身寶樓閣此堂終徧小

維心方刊正三國史某以精筆遺之蒙餉大篇
為謝氣格渾然三復感歎漫依元韻奉和蕪
陋增愧

諸豪雄誇劍芒鋸毛錐斂避收餘尖櫝間黯黯渴銅雀
案上爬沙枯玉蟾學堂山人有遺裔筆力大可千人兼

掉頭不肯書柿葉酒酣起舞怒奮髯十里歸坐溪口屋
傲視冠冕猶髡笄草玄草聖聊戲耳如醫識藥信手拈
邇來直筆到三國去取法度何森嚴眼中青白世矜異
皮裏陽秋誰顧瞻更憐中書今且老鷄毛葦管爭出奩
懸知入手便獐劣那復助子窮幽潛我持妙穎急送似
標題珍重存華籤勢如執法貴心正俗病要以此語砭
揮掃定見龍蛇走紉繹何憚歲月淹須知筆意似人意
柔順未必非凶愾

長樂梁世則為余言林氏達觀樓橫海嶠天下

奇景也索詩為賦一章

老眼紛世故百嗜了若遺忽聞佳山水未到神已馳
迢古長樂山水天下奇中有隱君子少讀昇天詞茲遊
不可遂樓居在屢屨要欲盡一覽吞滅海嶠妄想當宴
坐久遠意渺莫追定見月嶺墮洪濶浴朝曦蓬萊蔚相
向拍手招安期秀色故可餐却粒到玉芝何當往從游
下視培塿卑

和張仲宗送柯田山人歸隱

我家洄潭上下鄰左顧龜中有隱君子孤風邈難追玩
世逐虎鬼祈年訊蛇醫籬根縣瓠壺蔓野紛翠帷客至
勿遽迎借問來者誰

窮巷車馬絕杖屨得往來老儂起招呼情話真樂哉意
行忘早宴佳處首重回月出一犬吠柴門風為開收還
四方事老子良足哀

誰為雙眼青自失兩鬢黑溪山招客子占勝清涼國古

人如可作晚歲意何及是中但可飲慎勿忘酒德酒酣
動長忽驚問兵誰勒

往年城下盟殺氣橫九有脫身敵中來親戚驚老醜抗
言半渡擊失計推禍首誰能返秦壁爭欲仇魯酒着鞭
空浪忙好語得鷄口

有弟在一方丹臆危涕橫念言還鄉夢遙夜懷紫荊忽
興攬衣坐孤燈耿青熒雁奴信何功捫心愧鴻冥棄置
復棄置終尋白鷗盟

鄭維心用張仲宗韻見贈復次其韻奉酬

幽人卧南牕支床伏穹龜白墮意冥契黃庭心暗追身
閒有餘適國病何當醫此事姑棄置溪光掛屏帷顧影
或自笑問言子從誰

少日功名心偃蹇挽不來雄豪本戲耳靜樂真賢哉畏
事口三緘憂時腸九回無客榻長掛有懷尊自開酒酣
氣如雲高哦追八哀

胷中飽世故了了分白黑十年客異縣中夜夢鄉國買

鄰枕寒溪此計吾猶及大恐歲星惡翻令銷福德不如
早移文徑效山庭勒

浮名等浮雲過眼亦何有誰能學東鄰深顰不知醜朔
風吹飛霜素色侵皓首幽憂無與娛萬事付杯酒客來
勿多談要使耳如口

江濤故洶湧敵騎猶縱橫健兒委戍甲老農持棘荆去
年戰爭地白骨堆晶熒機權失猶豫理數歸杳冥誰如
管夷吾九合先同盟

次韻葉左丞見寄

先生少英發身為國元龜玉堂動敏翰諸老歎莫追向
來三折肱舉世推良醫小試經綸才艱難佐壽惟憂時
儻失聲捨我今其誰

巖棲分麾去鼎食羞嗟來憂樂有大者得喪良小哉實
心驚地坼攬涕祈天回願言國步肅追理邊隙開潔身
未足道王孫真可哀

幻緣東即西妄境白成黑那於土偶間平地見佛國雲

山樂未央歲月嗟何及恩讎一快意聲利多慙德名成
復逃名翻恐鍾鼎勒

胷中浩無垠富貴公自有厭居廊廟榮戲習村野醜荒
山披石林它年齊峴首殺雞脩晨炊魚羔行社酒此樂
應獨知世味難可口

仗馬失芻豆那顧一榻橫小兒衣挾楮老妻釵墮荆心
事獨炯炯眼力雙熒熒君恩未報償浩歌託沈冥上天
不難知誰能訊背盟

希顏提舉博士謁葉公左丞於石林公遺之詩

屬余次韻

劉侯磊落人中傑半生塵土略如我酒酣氣與天低昂
長笑拘儒費膏火虺隤一馬上高崗怪來喜色猶揚揚
探得驪珠攜滿袖明月掛空無價償

夾竹桃花

搖搖兒女花挺挺君子操一見適相逢綢繆結深好妾
容似桃萼郎心如竹枝桃花有時謝竹枝無時衰春園

灼灼自顏色願言歲晚長相隨

蠶

吳桑成綠陰吳蠶盈翠箔闔門障風雨荒祠動村落千
絲為衣被一繭自纏縛殺身以成仁此計殊不惡

松下追涼

佳哉十八公凜凜廊廟具大匠偶未收蒼髯鬱如許根
盤曲礧幽勢宅層崖阻清風自掃門當伏不受暑顧我
蕭散姿本是山中侶出逢畏日長隻影無地去偷閒蕭

寺游清陰直修廡神交先浩茫徑造不我拒斗酒起自
行開懷為延佇寒綠浸杯盤勁氣逼牙輔語已心地涼
外熱寧足禦公家綠骨蛇千歲穴深土何當供晨餐散
我腰脚僂它年聽颼颼危冠掛神虎此意亦大奇勿與
夏蟲語

龜谿集卷一

欽定四庫全書

龜谿集卷二

宋 沈與求 撰

律詩

呈唐子明同年

饑來驅我出蓬蒿
鬚影鬢鬢舞二毛
黃甲浮名誇俗子
白丁結習數吾曹
老盆貯酒心猶健
嬾架拋書趣亦高
萬事含糊自堪樂
不須持板念徒勞

攝尉歸安呈江嘉

無地誅鋤一束茅清吟端作反離騷奔波且復同香尉
蕭散還須似馬曹名下迹公初定價暗中索我便矜豪
文章論世寧論晚肯慕羣飛輒仰高

小雨

小雨廉纖未肯晴勒回花信待清明冷官何預芳菲事
空聽春禽作意鳴

清明日晚晴

正好園林藉落英細風吹雨濕清明牆陰草色休無賴

自有鳴鳩解喚晴

舟過荻塘

野航春入荻芽塘
遠意相傳接渺茫
落日一篙桃葉浪
薰風十里藕花香
河回遽失青山曲
菱老難容碧草芳
村北村南歌自答
懸知歲事到金穰

夏日書事

洗竹明新牖
疏泉理廢池
破礮炊玉粒
釣鯽鱸銀絲
假寐拋書帙
蠲煩泥酒卮
空餘八角扇
嬾惰不能持

秋日戲呈將達可檢討

西風撼撼舞庭槐
沈李浮瓜事益乖
不飲竟逃官長罵
長年唯厭太常齋
已看簾幕辭歸鶩
猶訝池塘沸亂蛙
坐想臞仙遙集處
應顏醉玉泥金釵

同官用僕秋日詩韻述懷因復和之

荷鍤相隨死便埋
達人於世豈長乖
囊錢擬定文章價
瓢飲聊甘祭祀齋
兒輩那知羣野鶴
我曹寧復問官蛙
何如細瀹烹茶鼎
日向松陰爇亂釵

從劉殿院借書

骨寒宜伴列仙臞
欲喜依劉計未疎
自昔暗中人易記
到今名下士非虛
欲從給事論奇字
擬向中郎得異書
願借牙籤三萬軸
為公一一辨蟬魚

過徐氏莊居

只著南冠不著纓
掉頭防我問功名
數椽茅屋有時漏
一垓野田無具耕
酒地定能容勝踐
墨畦終擬過平生
扣舷歸去蒹葭闊
後夜相思看月明

與道按田至湖山有詩凡九章次其韻

行盡郊原指掌平
亂峰爭聳髻鬟青
山家不識高軒過
驚走兒童戶半扃

右游天平山

瓦鼓喧喧磬土龍
紙錢零亂野祠中
誰能向此分餘漑
潤澤焦枯不計功

右白雲泉

出郭有餘適到山
無限清野泉依井
落古剎並湖成水

鳥聞中趣風松意外聲問僧知此觀身世若為輕

右題靈源寺

風埃滿眼作淒涼招隱空山此計長祇恐誤隨雲出岫
不如專以醉為鄉

右雲隱軒

仙去遺蹤亦漫留羽旗那復肯來遊欲知洞府烟霞邃
漠漠蒼崖面橘州

右題林屋洞口

聞道藤蘿一一攀要窮佳處識湖山青琳宮闕當西崦
應費巾車數往還

右題靈祐觀

山脊層壇古松根曲徑微衣冠久已化殿閣自相輝喬
木交加合閒雲自在飛無端雪髯老猶效鶴重歸

山有一老

人俗號
毛公

右毛公壇觀

我欲款玄關誰能供逋客相將持綵囊珠露滿蒼柏

右題上真宮

湖光奕奕洗浮埃古寺重門相對開
獻供祇憑山鬼去問禪時有野僧來
老農借釜爭炊荇瘦鶴翻階自啄苔
令尹定能占歲事為捐逋賦小徘徊

右題華山寺

過徐氏郊居

林梢渺渺墮斜暉剝啄還來扣隱扉
門巷劣容居士屨塵埃不到野人衣
恰當夜甑黃粱熟盛供春山紫蕨肥

侍坐無人只山月兩翁相對自忘機

到吳

三載故鄉別歸帆恰到吳食寒新火換天闊斷雲孤酒
市仍依岸漁村遠帶湖碧山千萬疊翻憶夢崎嶇

感事

鬚毛端欲改歲月竟相侵薄宦顏難彊窮塗感易深舊
交多得路古道罕知音吾事政如此飄零違寸心

旦日趨府

紫簫吹夢斷起視斗闌干瘦馬踏殘月單衣中薄寒錦
囊那復佩革帶頻成寬浪逐官曹底更題敢自安

次韻秀守苗郎中喜雨

旂旆傳呼起伏龍雨翻枯澤已全通招呼急吹添秋思
袪逐驕陽助歲功蠅子有知先避境

鄰境多旱蝗

葑根無着

盡浮空老農自笑豚蹄祝惠政流行盍屢豐

次韻盧憲小雨

狂風初作惡小雨似知時破睡心長折呼愁眼易飢勃

姑穿渡急鴉舅出林遲

土人以勃姑候雨鴉舅候晴

春事今如此幽

尋有底期

雨不止

已看城郭半浮楂水戽聯翩接渚涯天意若知民意切
停鞭且止阿香車

新春書事

早歲今逢上苑春蹇驢朝踏落花塵只今嬾問芳菲事
柳眼相看也笑人

次韻盧憲春意

少陵花惱便顛狂，天與多情付此郎。
宿露園林鶯舌亂，暖風庭院蜜脾香。
閒愁幾欲縈春事，幽怨還能入醉鄉。
應斷玉樓雙望眼，便須催促理歸檣。

清明

杏火燒空潑眼明，游人蕩槳綠蕪城。
山歌慣習吳歛調，水戲終含楚些聲。
草滿池塘春漲淺，鷺歸簾幕午風輕。
踏青舊約誰能問，已喜年來粥有餠。

報中有盛年休官者感而賦詩

中都如海士如鱗乘鴈雙鳬亦見馴
林下已無長往客江頭誰伴獨醒人
因循儻使能成事彊健何須便乞身
但喜高風激頽俗要令鍾漏一番新

有懷山中

可奈風埃老客游故山歸思日悠悠
軒裳結裏非吾事野性從來在一丘

冠卷塵埃亦漫彈勒移終復愧家山
它年猿鶴應相笑

勸羽卑飛久未還

次韻宏父喜雨

黃壟初看卷麥禾老農還復厭晴多
四郊戽尾開新瀆一雨苗根長舊科
已發政聲歸召杜更驚詩律鬪陰何
王孫欲識田家樂水亂溝塍涉可過

行簡以曾守韻見貽復和一篇

續經無復補嘉禾老去忘懷及見多
摘尾簿書寧問署點頭章句僅成科
求田下澤吾行且招隱空山子謂何

行簡有早晚故
山歸種稼之句

千萬買鄰真左計一丘端約老相過

申應時以圖尋山圖所載湖之西溪也為作二

絕句

王維買宅先成畫申子尋山亦載圖
它日真能營小築
此山佳處着儂無

故國山川真可老十年塵土負歸期
而今更笑申夫子
似我平生費夢思

客至具餉庖中止有豚肝客不食

三九家風故自寒朝來饌客到豚肝不須準擬供塗竈
口腹那能累長官

次律兄持節燕山且調兩河兵賦喜而作詩

伯也吾宗秀心期萬里侯燕民方築郡漢使果鳴騶更
借牙籌計聊寬玉座憂平生揮翰手此意莫淹留

中年情緒惡遠別信音疎聞道陰山路貪迎使者車騎
羊厭鳴鏑佩犢欲扶鋤願上螭頭奏煩苛一切除

喜次律兄見過

大觚橫江許暫留一樽相屬話牢愁封胡羯末名終在
許史金張迹浪投遵陸漸看鴻鴈集在原當記鵲鴿求
它年會有相從樂泛宅浮家萬事休

倦夜

獨坐苦無賴開軒懷抱空徘徊簾上月浙瀝竹間風清
影迷篝火哀音咽砌蟲怪來寒次骨霜氣已冥濛

單顏徒以盜失邑被譴赦令復官喜而有詩次

其韻

千里風雷起放臣反騷端欲陋靈均宦情遽逐鵬程遠
喜氣猶驚鵲語新它日鍾魚應落夢

顏徒寓
僧舍

半生塵土

未酬身會須更整青雲步往事當令問水濱

土人腊蛙見餉為作此詩

此族知何族生涯一廢池似能矜喜怒那復辨官私暑
雨浮萍鬧秋風牡菊遲肯嫌同腊鼠小嚼為紛披

送別

老覺交情重貧知世路高相看心已折此別夢應勞未

用脂長轂須聽詠大刀平生故人意能費幾緇袍

莊子經解官作二詩道別有江湖蓑笠之句次

其韻兼叙離索

雨餘千里見秋毫綠漲西陂湧浪濤桂楫蘭舟驚送別
鸞篋象齒記分曹官游莫漫嗟流落人事方將困驛騷
亦欲江湖理烟艇不知何處可容篙

自許論交絕比周向來傾蓋喜同流俗間久矣無青白
客裏終然有去留能事要須槃礴羸屨詞何必畔牢愁

看君躍馬章臺道肯為滄波夢棹謳

秉元以按田至村落有詩次其韻

竹戶連村閉官何此榜舟蒿萊半殘壟風露溢清愁試
為歌田畯那知餞蓐收老盆如見領應作小遲留

巖桂

小軒巖桂露香乾秋藥扶疎碧玉寒章句那能如許樣
夜深渾作月中看

次韻行簡北城登眺述懷

東觀無人數伏虔一臞塵土獨淒然高情自欲侵天半
清夢何由到日邊顧我書空嗟咄咄知君捫腹笑便便
登高懷遠無窮意故合春容賦大篇

行簡釋奠學官登北城眺覽有詩嘗次其韻再
和二章

奠幣儒宮已告虔城樓遠想獨悠然陰陰古木回潭外
渺渺平蕪落照邊野色向人聊嫵媚筇枝入手自輕便
興來不暇尋思嬾酒後狂歌定幾篇

當年蠟鳳識僧虔晚歲相從意惘然更笑豎儒多敗事
稍聞上郡已開邊酒醪窮巷誰能載簡牘平生自不便
風月兩溪真可老待收功業付詩篇

曾守置酒月波樓以張侔至有詩命坐客同賦
詞語平生故自蕪登高重愧賦成初諸君此處識老子
右衛向來煩長輿波上旌旗飛退鷁樓前歌管出金魚
回欄後夜同延月直下方池可更疏

金魚池洳
知久矣

夜坐

娟娟微月小牕東竹裏寒聲嘯夕風孤客坐來驚歲晚
推愁不去酒杯空

虛堂夜寂自神清更僕無端倦觸屏多謝短檠隨我老
更溫檀火校黃庭

曾守疾日以治法與之有詩見貽次其韻

聞道牙籤檢校頻昏花錯莫亂驚塵未須止酒妨投轄
便可捐書當徙薪肘後有方餘幾所眼中無障更何人
須公舊觀神明復準擬花前一笑春

次韻曾守立春席上七絕句

澤國春歸早連門競築臺夜來風力峭疎片半飄梅
曉凍穿流急晨光照火新四郊和氣合歌吹待班春
花光浮翦勝酒色動雕觴欲識邦侯喜眉間照席黃
跨臘纔更歲經宵併是春黃堂清訟牘欲助發生仁
日應東風轉春隨北斗回不須鄒子律餘暖到寒荄
曉卜農祥正遙知歲事豐小桃如有意欲吐故時紅
曲席紛羅綺中腔度管絲歡聲連萬井一一擁春祺

月波樓

突兀晴樓壓郡城樓前波面縠紋生何人合作佳從事
來伴胡床看月明

會景亭

柳株高下隔桃蹊萬頃烟波似漢陂畫手無人貌平遠
小亭風冷立移時

次韻楊縣丞見寄

雙瞳炯炯四筵傾少日才堪賦兩京花縣署曹聊試可

鱸堂傳德尚流清橫琴勿寫我志引水當令漉漉鳴
後夜扁舟同泛月野田端見綠蕪平

楊問
余歸

次曾宏父韻

小雨經旬戶不開隔牆青子滿江梅幽禽葉底如相識
睥睨空庭欲下來

三楚浮魂不可招夢游赤壁夜停橈朝來快讀黃州賦
猶喜周郎得小喬

微官似有不如無老去因循負壯圖但得誅茅三畝宅

世緣端欲付軒渠

未用欣然念可人世間那有白頭新出門更復推葱麥
笑殺扶風井大春

曾宏父作詩別行簡索僕同賦

俗間忘勝踐客裏度春愁挂頰真狂計焦頭乏遠謀剛
疎徒自許德怨浪相求奏乏三千牘詩慙一百籌豈能
資宦達端合辦歸休遣興鵝兒酒銷魂燕子樓枯筇青
草渡老屋白蘋洲此意無窮樂今懷未滿憂轉嘆寧問

諱繞指巨思柔二妙看騰踏頻年歎滯留花時閉深院

行簡移
病經旬

雲際渺輕舟

宏父將以
使事至湖

應念騎曹掾平生信謬

悠

曾宏父將往霄川見內相葉公以詩為別次其

韻以自見

客裏思家且罷休無聊懷抱不禁愁
鰭魚苦筍過百六
又到一年春盡頭

腸斷故園春到時
澆花日日遶芳蹊
而今夢逐東風去

小榼深杯手自攜

兩溪以南無數山興來徑造無時闌
空餘日蠟幾兩屐
日暮雲深天小寒

隔溪花柳自無賴
烟淡風微惱殺人
走向西家覓酒伴
芒鞋竹杖去尋春

牆根啁啾百鳥鬧
最愛乳鳩來喚晴
日永春閒深院落
渠能便當管絃聲

揚舲送子下茗雪
繫纜沙頭多柳株
十載風埃老行客

不知鷗鳥記人無

前溪溪頭玉色魚羊酪豈可比鮮腴江黃會中有勝處
健步走置煩長鬚

野店山茶亦可口試敲松火煮石泉相逢故人如問訊
但道老去多煩煎

翰林曾中浩千古筆頭戲作江海潮子行造膝可問法
門前烟浪拍溪橋

邦侯言語妙天下學海故自吞百川傳杯擊鉢盡具眼

醉中莫漫思逃禪

舟中即事

逗帆風借力入坐水浮光村落知多少郵亭自短長跳
魚吹暗浪浴鷺耿殘陽又是吾廬遠相看思渺茫

舟過北塘

嫋嫋輕颿動娟娟佳月升岸回雙樹暗村遠一燈明過
鴈參差影跳魚撥刺聲停橈且勿去吾意不勝清

羨墓

朱買臣妻墓
在嘉禾北塘

富貴因人德未酬
繡衣歸去竟何求
荒墳三尺斜陽裏
千古徒增女子羞

舟次吳淞江

棹發鱸鄉晚頻經
桂子秋嬾投青玉
案政敝黑貂裘水
落喧漁市雲微辨
橘洲五湖烟浪靜
誰復泛扁舟

吳江阻雨過豁然閣次周廉彥韻

花鴨呼羣自拍浮
何人蓑笠在孤舟
半生已負江湖約
不為經行肯暫留

濛濛小雨麥秋天江上人家欲暮烟行客未能忘勝處
繫舡來伴白鷗眠

我本三生一散人翩然小棹五湖春何從便結滄浪伴
纓上而今有宿塵

燈上人願齋

道人小室要觀身兀坐蒲團莫欠伸縱有諸天來應供
靈龜納息自為真

次韻江元壽題寧境寺湖光亭

客行終日厭區區
暫借晴光照坐隅
水漾龍鱗浮翠渚
葦開雉尾供伊蒲
欲隨漁子飛雙槳
似與仙翁在一壺
目亂風埃知有幾
肯來幽處濯纓無

舟中聞元用遂魁天下士論歸之輒成五十六

字呈宏父車馬至中都當舉似也

翰林發策冠諸儒

先內相考中廷試第一人
以嘗受任子恩降為第二

再世重歸

汗血駒醉後揮毫凌月窟
夢中插翼上天衢

元用嘗夢
翅生兩腋

一飛
冲天半生懷抱吞餘子
一日聲名振八區
歸去玉堂清

夜直也應憐我老江湖

吳門別曾宏父

招手湖山初識君

昨歲西湖始得相從

眼中已復見輪囷清言自

是一時傑豪氣欲無千載人客路臨分隨夢遠老懷論
舊覺情親心期不免功名逼儻記江南草樹春

還憩湖光亭復次江元壽韻

羊酪蓴羹本異區江湖隨俗語
娵隅紫鱗撥刺衝文行
翠羽翩翾過綠蒲
舴艋興饒青絡馬
筇筍自當紫微壺

叢書校罷頻搔首天末孤帆去欲無

次韻錢德初九日旅懷三絕

西風江面荻花秋鱸玉頻年念昔游客帽只今無地落
黃花滿眼漫供愁

登高虛欲夸能賦樂事何曾副賞心斜日孤雲兩愁絕
一觴聊為盍朋簪

濁醪自稱和山藥

張籍詩作酒和山藥

小令新能坼水花況有阿

戎供細雨豈知秋思滿天涯

過嘉禾野塘

木末孤烟起夕炊茅簷直下釣魚磯
蒼茫遠水連天碧一葉短篷何處歸

僕夫自燕山來云有次律兄書被盜失去

投曉平安使倉皇扣倚廬修塗幸及此
細語問何如云自三關道曾持一紙書
崎嶇經寇難隻影到鄉間

杜季習遊恒山謁府帥劉公輒次劉彥常韻作

二詩送之

勇往都忘去路難
曾吞螭虎氣桓桓
吳頭楚尾三年夢
塞北江南五月寒
瘦馬繫門留我別
明珠攜袖許誰看
書生自有西江量
何止能濡舌本乾

上相平戎不作難
已開亭障徹烏桓
公朝問罪知誰敵
窮寇要盟故自寒
烽燧報安千徼肅
羽書飛捷萬人看
書生夢想從軍樂
雋語銘功墨未乾

李習欲以
銘投府帥

董采大有詩紀吳江豁然閣舊遊索僕繼和

湖陰舊雨記重來
小閣深明傍水開
蟬螭橫空橋倒影

琉璃拍岸浪成堆勝遊君復羹魚婢幽屏子方飯芋魁
遙想經行斷堤曲野花漂盡雪玫瑰

次韻河陽張先父秀才

雲疎日薄九秋深故國懸知詠橐砧試拂青萍憐氣在
更攜綠綺覺塵侵浮家泛宅三年夢臨水登山萬里心
小騎羨君盤谷去肯如思越費清吟

託長興吳宰僦居

一區無地可經營宦牒東西寄此行問舍它時聊爾耳

浮家今日太勞生肯將口腹累安邑正欲絃歌聞武城
為我三間卜茅屋夜深來聽讀書聲

寄次律兄學士柯田山新居

柯田一曲抱清灣兩角孤雲擁髻鬟猿鶴驚心招舊隱
桑麻掠眼接通闌似聞小築終年就應是幽扉盡日關
為報添丁護鷗背夜寒歸夢遶家山

沈景修宗博示試院書事二章次其韻

巖谷何人歎久幽紵袍一一赴兼收銜枚盡欲成堅敵

懷璧渾疑忌暗投獨訝終篇惜鷄肋更須添燭校蠅頭
文章到此無殊律共賦菁莪汎汎舟

探簾山鳥一聲幽斗覺晴光爛不收好夢已尋江上去

清篇更許坐中投欣逢阮籍開青眼肯學虞卿賦白頭

聞道月波春色滿好攜行客住行舟

景修秀倅月
波蓋其郡樓

次韻院中四絕句

行盡江山不記村卻隨花信到重門也知春色嬌無賴
取次先來綠草根

一尊相屬語黃昏
密雪飄零正滿門
記得江橋回馬處
冷香應斷玉梅魂

要知春色到池塘
深院無人午夢長
已覺此身便靜樂
自溫檀火炷爐香

荳蔻梢頭春意濃
輕狂無奈賺花風
今年拚却尋芳晚
準擬殘枝占晚紅

石壁寺山房即事

雲根斲翠接山椒
小築初營一束茅
未放野泉縈曲磴

旋移寒綠引春梢

望斷南崗遠水通客檣來往酒旗風畫橋依約垂楊外
映帶殘霞一抹紅

石壁寺

山縈細路走修蛇峭壁連雲只薜花木末忽看幡影亂
馬頭初見殿陰斜迴廊迤迤穿危嶠側澗娟娟露淺沙
秀色可餐吾事辦粥魚茶板莫相誇

無言頌政以詩寄行簡輒次韻

鐫磨文律似攻駒十載相從亦數子卷白欲傾東海酒

閉門貪鈔北堂書風烟入眼山圍座鷗鷺驚心水滿渠

公頗樂新居得谿山之勝

此樂定非公所有為聞鼇禁席頻虛

右謂無言

平生狗曲視驪駒妙語琅琅獨起予酒面那能伴從事

行簡為酒官為五斗屈也

筆頭翻欲戲中書官曹似是驚蓮幕問訊

何如念石渠只恐浮名不論數要須人識士非虛

右謂行簡

行簡用前韻見貽復和酬之

歲月如馳鬪隙駒星星著鬢故欺予身宜丘壑長經夢

語到軒裳輒廢書局步共嗟妨遠趾清溝自覺映汙渠
黃麻白簡公心事此去聲名定不虛

過卞山次韻朱仰止澗亭絕句

曲澗潺潺隱石堤玉蚪雙引戲晴漪相思後夜添清絕
木落山空月半規

環珮琮琤落斷崖水清石瘦沒平沙幽人散策經過地
草閣柴扉趁水斜

昔年

昔年尋賀老同泛越溪航
雨發千巖秀風供五月涼
目因秦望斷心為禹祠傷
聞道東湖地新來足稻粱

秋懷二首

庭柯脫翳葉歸翼斷經過
水檻清漁罟風櫓響藥羅
傲霜荷柄少團露橘叢多
秋色遂如此愁成今幾何
林梢吐寒月清絕不勝任
蠻榼憑誰共胡笳祇自吟
探簾風似翦切戶斗如斟
何處行舟動澄波自委金

即事

卯酒賸澆胃礪魄晨梳聊理髮翦髻方床自岸烏巾坐
欲校黃庭嬾未能

秋日閒居

茅屋秋風斗破除蕭騷渾似浣溪居青山侍坐從吾好
黃帽籠頭與俗疎賴有園官能送菜可無溪友解留魚
從今輒莫慙枵腹一飽須煩插架書

送盧左司赴闕舟中口占

胷中渺渺九夢澤筆底滔滔三峽流自合勲盟真易與

漫回詩律付冥搜平生所慕李君御今日聊登郭泰舟
去矣相望重搔首百年心事小遲留

野外罕人事

野外罕人事雖貧心自寬霜蔬供綠節社酒泛黃團日
落歸牛近風微宿鳥安展書遮老眼燈火砌儒酸

過竹西

百折清灣抱野田竹西風物故依然歸牛更背斜陽去
牧笛一聲吹暮天

贈老禪

霜根刺刺蝟圓顱猶倚禪床聽木魚底事世緣能老我
到頭塵事不關渠磨甑幾日能成鑒閉戶何人欲造車
若有小參重問訊試尋消息向真如

成士穀校登真訣垂就為作此詩問訊

成欲卜居三茅

硬黃親校大還書巖石相看已甚臞會遣五丁供給使
聊煩六甲奉庖厨仙風自昔人何有靈氣於今子豈無
知得茅卿近消息應驂白鵠到清都

謝葛魯卿雪中遣介送酒

雪舞白衣朝扣門一車送酒借春溫
寒威任減東陽帶和氣全歸北海尊
應為半生憐麴蘖更留它日燕鷄豚
是中可飲公須記報字如鴉醉眼昏



龜穀集卷二

欽定四庫全書

集部
施穀集卷三

詳校官左中允_臣瑋五珠

主事_臣呂雲棟覆勘

總校官編修_臣王燕緒

校對官中書_臣吳俊

謄錄監生_臣楊兆豐

欽定四庫全書

龜谿集卷三

宋 沈與求 撰

律詩

長短句附

正月十四夜觀燈南寺子虛有詩次其韻兼呈

駿發次顏

娟娟佳月掛南樓
蕭寺真成秉燭遊
火樹忽驚新節物
春衫不趁舊風流
公方高卧追三已
我亦狂歌發四愁
為報襟期得名勝
何妨著處一開眸

初約子虛不出以次顏見招而往

再用子虛韻和呈駿發次韻

燈市燒春接郡樓，歲豐人樂事遨遊。
繁絃急管方連夕，痛飲高談自一流。
短帽縱堪陪勝賞，長檠那解照牢愁。
歸來卧對西牕月，獨想清光燭電眸。

十里笙簫沸市樓，已占風物兩優游。
人從月窟開青嶂，燈挾星河映碧流。
曲席深杯成徑醉，長廊古寺溢清愁。
暗中我亦知公在，彊對蘭膏為舉眸。

子虛復有詩再次其韻

誰能延月倚危樓細履相將偶當游倦聽山歌懷舊俗
閒看水戲濺寒流

土人以水戲然燈

燈光競作千門曉酒力微

寬一掬愁明日八分疲阿買詩饒元只在清眸

次夕雨作用于虛韻奉懷次顏知魚軒小集

夾道繒山聳蜃樓小軒終憶數條游月將人意十分滿
雨入溪光一派流靜聽屐聲喧夜市旋挑燈炮醞春愁
閉關不問陰晴事時怪玄花掠病眸

別羣從

十年勞遠夢今日又征鞍
雨入花梢困風生麥浪寒
飄零逢酒怯老大別家難
去矣功名事終須把鏡看

瓜步

呼去聲漸逐潮頭遠
帆影低隨日脚斜
已喜扁舟近瓜步
江鷗無數立寒沙

將達行在所

潮落江城暮帆開一葦輕
雲屯六龍駐天近五星明
率土朝方岳何年洗甲兵
君王似光武折箠看昇平

陳子尚博士休官還京口作此詩餞之

勇退曾無屋數椽掛冠神武便飄然陶潛去家一百里
張翰收名四十年平世深知還有幾少時健決已無前
子尚昨主臨淄簿與部
使者論不合徑去官 侏儒飽食堪羞死莫浪狂言為
著鞭

西風江上荻花秋鱸玉頻年念昔遊世事真成一可慟
身名那問二宜休公卿禮餞何為者僮僕歡迎有此不
鬚影毵毵紛翠葆晚來鐘漏亦懷羞

得家書

國步猶艱棘不堪頻問家
霜毛失翠葆蒿目亂玄花
孤客知時節殊方度歲華
干戈就休息歸理邵平瓜

觀瓊花

千里隨河走濁流
檣烏東下指迷樓
春風簾幕今何在
只有瓊花伴客愁

卽事和卓彥翼

瞳矐曉日上簾旌
簾外幽禽作意鳴
呼斷故鄉千里夢

起來搔首問歸程

即事

造物勞人亦惜哉
又驅疲馬上崔嵬
經從野店初嘗筍
行盡江村始見梅
千里短書先夢寐
半生多難足風埃
桔槔俯仰成何事
已念漁蓑歸去來

次桐廬

泱泱溪流不滿灘
獨憐舟子上風灣
日斜指點西村渡
竹戶茅牆趁碧山

吏鞅縈人未許閒
當游聊復到春山
倡條冶葉無風味
賴有寒梅醒病顏

於潛道中

首路潛溪驛
鷄聲欲曙天
籃輿衝宿霧
棧閣寄層巔
高下林端屋
橫斜石罅田
野泉隨處有
草木盡蒼然

新城道中

馬蹄隨意到回首
隔南崗日落鳥猶語
春歸花自香
長紅媚幽谷
新綠漲回塘
假榻知何地
昏鐘出上方

宿葉璋橋庵舍

渡澗穿林夕未休
野人篝火引前騶
驚從畧汭灘聲急
喜見廩廡草蓋修
雲卧自驚魂夢冷
星馳先惱肺肝愁
乞身老我雙溪上
記取端能賦遠遊

水閣小憩

雲氣昏昏雨脚垂
客行終日倦奔馳
竹間小閣臨清瀨
俯檻觀魚立許時

祈門道中遇雨

了事癡人有底忙
篋輿勃窣到南岡
樵風撼撼羣狙喜
山雨蕭蕭萬木僵
谷底暗分冰澗落
舍旁時度野梅香
殊方歲晚多悲感
歸老丘園此計長

東西二林寺

湓浦維舟訪梵宮
香爐峰下暫從容
重來不為二林景
永遠禪師有舊蹤

在昔得名齊連牆亦共蹊
修篁同碧嶂寒溜合清溪
閣影高低並鐘聲左右迷
遊人俄省悟東即是林西

遊人多入東林寺將謂西林景不如我策短筇行半日
水聲松韻更清虛

千秋嶺

錢氏嘗築四壘以限江南北者盜發旁近復於此守禦

山河四塞限中原籬落而今不復存豺虎晝行何日息
但餘征戍滿荒村

吳越江南絕壁間可憐爭國似螭蠻百年父老陶王化
尚記流傳一醉顏

次韻鄭維心臘月十六日有作

國難更頻歲邊塵動四溟豺狼飽吞噬天地失清寧黃
屋無安所霜笳不忍聽使臣歸路阻慟絕鬚星星

朝廷歸叛將關塞失簽軍銅馬猶逋命沙蟲亦占羣上
心存廟畧兵氣亂天文誰挽斜河水通宵洗赤氛

血戰遮東道今誰廟食雙無人扞疆敵縱馬飲長江寇
掠元干紀兵臨反誘降將軍自不武慚色上旌幢

次韻避寇二首

窮途厭遷次歲晚惜分攜茅舍荒村北柴門曲港西鷄

豚鬚同社桃李舊成蹊那得干戈定浮家著兩溪
宦遊成屢卻戎壘悵頻遭聞詔趨吳會經途事董逃心
期紓國難力欲挽人豪漂泊多危涕真成失木獐

游城山夜歸泛舟南溪

杖藜尋勝款禪扃歸去扁舟伴月明卧樹低推山脚轉
跳魚撥刺艣牙驚烟埋橋影雙霓斷風熨溪光一鏡平
聚落半空無市井兩三燈火短長更

次韻李通直題慈相寺雪月亭

曲檻飛甍界碧空盡供勝覽屬禪翁蒼藤翠木四圍外
遠水平蕪一望中幽鳥林梢鳴不斷亂雲天末去無窮
素娥青女今何在

淮南子青女主霜雪

歸步聊乘兩腋風

扈御舟泊錢清江口值雨

打窗悉窣連江雨吹舵嘔啞拍岸風蓬底醉眠那得穩
時聞鷄唱夢魂中

法駕親巡海上還鉤陳萬騎列江干潮生風熟樓船過
雨助洪濤失故灘

過平望

未辨扁舟掛綠蓑，人間何處不風波。終須徑為鱸魚去，

笠釣歸尋張志和。

平望乃張志和得道之地。

次吳江

水闊風豪浪拍天，魚龍戲舞墮饒涎。尋常行處多翻覆，
看我孤舟得穩眠。

小邑蕭條兵火餘，狐狸入市自相呼。茅牆竹戶斜陽裏，
十室生涯久已無。

冬至遇雪題明因寺僧房

宦學差池已倦游一犁真欲老西疇天公為作豐年信

更喜將軍入蔡州

是日聞王師入杭

遙想燕山落大花更堪直北渡龍沙六師挾纊懷輕煖
取日誰能反翠華

方允迪隱鷗鷺舊谷江子我子之劉希顏行簡皆

往依焉為此詩寄贈

脫葉驚飛海角秋君王虛佇急良籌列仙山澤底無用

孺子滄浪渠不憂百鷺可能如一鶚二江知復帶雙流
渺然相望暮雲碧兀坐蒲團搔白頭

八月十七日扁舟渡錢塘江

一言初欲寤明君去矣終緣丞相嗔鳬鴈江湖真我輩
龍蛇山澤定何人市中未識馮延壽門外已呼祁孔賓
尚有憂時心未歇西風吹淚濕綸巾

沙背波生柁脚開扁舟老去許歸來風帆一點日邊下
雪浪千堆天際迴城郭荒蕪迷舊隱江山寂寞寫餘哀

此心元自無機事寄語輕鷗莫見猜

允迪招行簡卜居鷗鷺谷僕意羨之作詩送行

兼以自見

嚴陵灘下鷗鷺谷聞道元英舊隱廬鼻祖名高詩格在
耳孫才傑宦情疎漫山松桂鴈行立入鳴茅茨星散居
知為劉郎賦招隱莫教花落通渠

少日長懷社稷憂怪來饒舌漫多仇風塵冉冉百年老
霜雪蕭蕭兩鬢秋不辨癡床供一笑方營隱谷賦三休

添丁護得金鴉背佳處端能著我不

維心過邵子非溪亭夜話有傷時感舊之作索

余次韻

官儀全復漢盟會競尊周郊野多戎壘衣冠半客游地
偏朋舊鮮人老歲時道莫厭經過數相看又麥秋

朝廷策數馬寇盜谷量牛世亂思奇畫身閒喜勝流
鸞霄漢侶鳬鴈稻梁謀得趣皆為達那能陸盪舟

聞道津亭集青燈夜色浮鶴鳴驚獨鶴魚伏避羣鷺月

澹帆歸浦風腥網挂洲語深投七立此意得無憂

虎帳師頻歟民窮粟屢搜會須夷喪亂寧敢厭征求黃
屋中天立彤弓幾日酬寸心終耿耿不獨為春愁

心事空牢落身名盍罷休得閒羞彊聒避謗巧淹留老
矣嗟如此誰歟問以不儻容親杖履不擬向丹丘

余得守丹

丘方欲上
投閒之請

劉希顏持節按縣招維心舟中小酌次維心韻

大艣浮溪曲華旌暎道周勞農纔徹警問俗偶成游王

事今云棘官稱古號道正須哀疾苦輒莫詫防秋

希顏按防

秋事

隨處喧銅馬何人炫木牛輕捐小山句急捍大江流行
邁心疑醉周爰事喜謀招呼隱君子高浪兀虛舟

故國真如寄餘生宛若浮巢鳩不護鵲池鳳肯容鷺老
木低春水孤花帶晚洲杯行應酌我知復念幽憂

山林懷獨往圖史縱旁搜此士俗間忌吾儕句裏求大
篇終寡和小酌漫相酬脚踏溪流亂端能醒客愁

大邦通間道小縣得中休交分傷離合王程惜去留索
居垂老矣劇飲尚能不倦夜評今古誰憐貉一丘

子虛航重湖之險遠過山中輒次維心韻以謝

客裏傷為別相望歲一周冕旒存異顧

去歲子虛蒙賜
對天語稱獎

丘壑老英游憂國心長折驚人語太適年來有公事合
眼注春秋

小牕眠蠍虎敗壁上蝸牛老樹陰垂合前山翠欲流狂
言違世用彊飯了身謀不謂輕千里能迂訪戴舟

此客今那有迎門喜氣浮
心閒清似鵲眼淨凜如鷺塵
榻開蓬室風帆卷橘洲
襟期適相契一笑發羣憂
寶厯方重啟英才必盡搜
題輿偶淹泊勝道會營求
浪漫貧逾適經綸老未酬
雲林得攜手切勿志窮愁

暮雲凝遠碧覓句擬湯休
不分千山隔才為十日留
高風誰繼者清夢自驚不
聞說星躔動何人識太丘

次韻學士兄見一亭

自稱居士擬香山
隻影江湖得暫閒
大隱可能追襌襪

小亭聊欲對孱顏持盃有月同歌舞策杖無人共往還
聞道修篁解新籜密遮門逕不須刪

塵土敗名如敗敵雲山招隱似招降漫傾魯酒醒猶獨
聊發吳謳調本雙誰念佳人在空谷自同漁父老清江
它年對榻分餘地風雨蕭蕭夜打牕

次韻學士兄述懷

故國風烟素已諳結茅端欲占重嵐聚蚊那肯追金谷
號虎真成賦石龕阮運經過度陽九幻生顛倒識朝三

它年自有鷄豚約小阮新居卜道南

葱麥推還井大春拂衣歸伴臥雲人
胷中歷歷蟠三畧肘後時時校六淳
已作移文排俗士更將要術混齊民
知閒聊復求閒地歲晚功名恐逼身

風竇雲子六淳之葉仙藥也見漢武

內傳

次韻黃子虛所居隨緣堂

應羨扁舟泛五湖隨緣卜築伴樵蘇
青山衮衮成嘉遯華髮蕭蕭負壯圖
松檜騫騰元自植魚龍吟嘯巧相娛

清宵背立巖前月大呌三高更疾呼

次律兄餉魚魚不至而詩至頗類南海使君送
酒輒成三絕一笑而已賜茗少分以報厚意
憑虛公子騎鯨後烏有先生控鯉初可是凡魚亦仙去
空餘一紙腹中書

先生遠餉錦鱗鮮剥啄扣門驚阿連只有珠璣落牕几
空教口角墮饒涎

尚方小鳳賜精芽戲比瓊瑤報木瓜夢境紛紛非實相

往煩鈎起睡中蛇

曉過鄰村

推枕夢初斷
籃輿踏露行
歲登人意樂
風急鴈行驚
曲澗哀湍瀉
危橋獨木橫
清霜莫欺客
雲日自晶明

即事

鵲噪空庭曉
霜明百尺樓
連韉響晴日
遺穗落平疇
黃菊疎籬晚
丹楓別岸秋
怡情有底計
開甕玉蛆浮

竹樹參差合
溪流半隱扉
雨昏鳩婦鬧
風急鴈奴歸
策

杖循沙步褰裳到石磯游魚吾共樂身世自依違

過梅知宮東軒

舍南舍北花無數眼看游蜂上下狂風信晚來簾額動
黃庭相對一爐香

允迪遣書問訊并寄示與子我唱酬佳句猥及
微蹤輒用廬字韻為二詩以報嘉惠

泛愛何人枉素書銀鈎奕奕到田廬朋游久許貧方耐
宦學空憐老更疎回鴈峰前應夢到放龜池上也齋居

允迪得郡衡陽僕丹丘皆待遠次僕居龜溪方事投閒之請會允迪書到亦云相期保社同香火口禱功名乞與渠

不從吏議汙丹書恩許懷章返故廬投老有緣知分溢排姦無術愧才疎勝流踴躍聞歸擢妙語吹噓慰索居懷望北轅心已折忍將時事付軒渠

書懷三首

應俗由來嬾謀身尚敢先栖從見嫉僕僕豈能賢駮馬常追日方舟可濟川人生各有趣心目慎相憐

暗中人易記名下士非虛此道憑誰辨它時或自如真
能食萬戶定復愧三閭富貴雖吾有當令功可書

事業貴不苟聲名難預期功非宜食肉道豈忘羹藜政
恐儀無舌那論緯有髭漢庭今用少覽鏡獨何為

劉希顏提舉見過出示下山居二詩次其韻

偈仄風塵際分攜歲月賒向來聞避地勝處偶為家對
客談鋒銳憂時酒量加中觴莫辭醉回首又天涯

小別千山隔相看一笑溫丹心獵風旆華髮粲霜根鴨

鴨爭呼伴鷓鴣自識村更須判劇飲落月倒窪尊

張仲宗有詩懷歸因次其韻勉之

相逢無日不懷歸又是春山聽子規
休歎豺狼迷道路似聞貔虎仆旂旗
那從薄俗求青眼還向高堂念白眉
南望孤雲應目斷殊方歲月易推移

南北山探梅俱未花維心從家圃折數枝以餉
坐客蓋半開矣會次律兄有詩輒次韻

山北山南雪意忙梅花未肯鬪寒芳
懸知小圃爭前發

為折疎枝分外香故國年華驚晚晚老人心事伴摧藏
更看陌上傳春信倚杖空懷遲暮傷

次韻鄭維心探梅未花

木落空山不著行寒梅長是占年芳未容霜女窺孤豔
定恐花神嗇舊香竹杖穿林聊問訊槿籬縈路巧遮藏
誰能折寄江南恨北客相看揔可傷

聞道年時醉一觴野梅飄几薦餘芳兵塵不礙含生意
花骨猶存底死香入夜從教月浮動爭春空被雪埋藏

憑君妙句先催發調護高枝莫中傷

復次韻呈維心拙澀不工當為抵掌

岐亭幽夢墮微茫百草先春自不芳
山雨壓低臨澗影天風吹下滿林香
梨花少韻非儔匹竹葉多情故斂藏
長記江橋閒立馬落英誰掃重情傷

粲粲疎梅短短牆騷人長恨失遺芳
低徊草棘精神透彷彿關山魂夢香
月淡乍看清影亂春深終恐綠陰藏
歲寒為爾添愁絕倚樹微吟亦自傷

次韻維心憶梅

野花飄盡江梅發為報先春一信芳
近水疎林風格老故山歸路夢魂香
雪霜貿貿添愁絕蜂蝶紛紛預屏藏
折寄憑君呼健步生枝莫放手痕傷

次韻行簡懷次律兄

門對青山水繚牆隔畦花卉盡流芳
澆胃快瀉驚兒酒襲鼻長聞柏子香
夜雨對牀成契闊晚雲歸岫識行藏
抽身未試平戎畧空為憂時倍感傷

邵子非謂予有天台之行見貽以詩次其韻

巉巉老氣鬱青霞過我依然醉帽斜為說驚魂招楚些
忍聞悲曲動胡笳扁舟犯雪來何許健筆凌雲語益嘉
莫笑海山風引去要尋源上問桃花

次韻劉希顏蠟梅二絕

仙衣曳紫練裙黃天遣清臞勝國香月上小牕寒影動
不禁風味惱剛腸

剪成香蜜綴疎枝度臘爭春已恨遲清夜無人花睡去

小園風露更相宜

次韻雪

紫簫吹斷玉梅魂夢入江南幾處村
半夜落英飛不定
旋添清絕到柴門

月下獨步

娟娟微月小庭西月下幽人影自隨
賴有寒梅伴愁絕
一枝清艷耿疎籬

次韻次律兄除夜述懷

此身傳馬與時移過盡三餘又一歸野炬占風迷夜色

農家除夜以火炬候風色占歲事

村有宿歲待晨晞鬢華老去能餘幾

心賞春來轉覺非慚愧君恩許閒佚食蔬那比首陽薇

餞歲鄰翁席屢移拍歌猶聽夜深歸尊浮凍螳霜逾重

林噪寒鴉日未晞剩歎飛騰憐杜老

見守歲詩

過為孤憤陋

韓非干戈滿眼傷時節遣戍長聞賦采薇

次律兄以蘆菰見餉并有詩次其韻

歲晚嘉蔬已向萎獨餘蘆菰老霜畦收隨芋栗供山谷

贈比頻繁擷澗溪菹亂金釵入珍饌羹融玉糝脫汙泥

程春定覺人彊飯功技蹲鴟自不齊

金釵事見荆楚歲時記

次律兄以鼠盜防風感而作詩命某同賦

嘉蔬靈卉兩紛紛小摘山花自出羣芽茁短根紅玉卷

葉敷疎節翠旗分細看藥譜鐫遺錄終擬騷經補缺文

堪笑饑飢穿敗篋寧知野鼠力跑雲

防風苗亦名山花野鼠喜食之

戲酬嘗草茶

慣看留客費爪茶政羨多藏不示夸要使睡魔能偃草

肯慚懽伯解迷花一旗但覺烹殊品雙鳳何須覓瑞芽
待摘家山供茗飲與君盟約去驕奢

某蒙學士兄相要陪賞芍藥花多白者月色相

射光彩映發殆玉盤盂之苗裔耶維心有詩

輒次其韻

悵望揚州千朶盛數枝聊足慰淹留相逢月下陪真賞
一醉花前得勝遊鑿落細斟金暈側盤盂斜颭玉光浮
春衫並色渾無賴映帶霜毛笑隱侯

溪亭夜坐

波面搖風暑氣微
禿巾來坐釣魚磯
相看月墮行人盡
只有流螢上下飛

松架

聯絡樛枝架短簷
蒼髯綠骨尚依然
祛除畏日心三伏
領畧清風直四筵
好在老龍蟠夭矯
悞來孤鶴舞蹁躚
那堪側雨敲牕夜
貪聽颼颼自不眠

代人作壽詩

老人明處識斜河曾占充閭爽氣多蚤以才名凌屈宋
戲將詩律鬪陰何丹臺舊綴神仙籍黃屋仍垂將相科
禮絕座間公未晚且提鴻筆上鑾坡

英氣超超不可親溫然笑語便生春絳帷久屬宗師任
紫橐方叅侍從臣八面文章寧有敵一門忠孝信無倫
山東出相公家事只擬尊前詠大椿

張侔生日以詩為壽

宿歲雕盤供五辛充閭佳氣已生春俊游自合陪金馬

英骨人猶記石麟別乘重分千里政五湖追數十年身
知公隱德宜難老鳩杖看扶法從臣

詩悼鄒仲容教授

骨相自清臞居然澹滿軀高文凌鮑謝勝畧本孫吳驚
驚期千仞驂騑殞半途傷心九泉恨那忍奠生芻

徐縣丞挽章

插架遺編滿依然手自臨瓊辭寧世用高調罕知音白
髮浮湘意青衫忌鵬吟些招空往事魂斷舊家林

蔣司成挽詞

法駕天臨五學初，曾聞重席絕諸儒。
雍容久載從臣橐，晬晬猶分刺史符。
不使高材陪鼎鼐，卻收清節傲江湖。
賤生無地從巾屨，獨對遺篇想步趨。

召節西來屬老成，乞身終欲返巖扃。
新書未奏三千牘，舊說曾繙十二經。
漢室首推施氏易，衛人端識孔悝銘。
儒宗學府今誰輩，空使諸生記典刑。

曾逢原挽詞

代劉侍郎

落落江湖一偉人當年玉立映簪紳
四朝耆舊推先達三國英雄出後塵
金板祕謀空洩汨土門奇禍足悲辛
懸知精爽猶堪畏嚼齒傳聞不滿齟

驚聞義骨殞狐狸悵失中朝一吏師
廣漢威名由擣伏寬饒直氣不容欺
丹心共憤時多難白首相期論少卑
滿眼西風空濺淚何心忍讀蔡邕碑

安次山挽詞

代劉侍郎

都門惜別淚沾巾回首孤城草木春
封豕遙聞食上國

疾風懸料識忠臣程嬰已死終存趙揚子雖生輒美新
青史高名知不朽遺榮猶貴土中身

曉殿傳催玉筍班東風小立照衰顏臨分愧我江湖上
伏節悲君矢石間往事淒涼千古恨舊交零落幾人還
殊方更致生芻莫目斷高丘涕淚潸

劉資政輅挽詞

國恥忍言城下盟忽驚河洛失清寧心摧寶仗離宸極
血濺轅門落將星請死自緣鳴越甲乞師誰為哭秦庭

高名會與丘山重一誦遺箴一涕零

志士長悲處死難唯公勇決一言間結纓季路空遺跡
投閣揚雄亦厚顏義烈崢嶸昭國史忠魂寂寞閔家山
隻鷄已負它年約下客傷心兩鬢斑

挽詞二首

職為蘋蘩謹門推黻冕華筓痿初鞠幼壽考竟肥家玉
暗傳經簡金餘賜詰花斑衣無復戲遺恨徹天涯

耄期何所樂有子使三吳方享千鍾洎俄成五鼎踰構

堂遺素幔祔域閔黃壚欲拜臨終像它年記結趺

吳宜人挽詞

壽富居然五福先簪纓況復世蟬聯斷機志節酬平日
舉案風流記昔年上郡方蒙湯沐地諸郎應廢蓼莪篇
送車千乘松門道會有雙飛鶴戾天

長短句

浣溪沙和鄭慶襲雪中作

雲幕垂垂不掩關落鴻孤沒有無間雪花欺鬢一年殘

欲把小梅還鬪雪，冷香嫌怕亂沉檀。惱人歸夢繞江干。
花信催春入帝關，玉雲爭臘去留間。不禁風力又吹殘。
客舍不眠清夜冷，縈愁一縷裊旂檀。空庭月落斗闌干。

葛使君示書有元夕寒廳孤坐之歎，昨日石林寄
示所和江神子，輒亦次韻和呈，因以自見窮寂
之態。

華燈高宴水精宮，浪花中意無窮。十載江湖重綰漢符銅。
應有青藜存往事，人縹緲佩丁東。卧聽蕭寺響疎鐘渡。

谿風轉空濛月上孤牕鄰唱有漁翁追念使君清坐久
歌一發恨千重

又和葉左丞石林

魚龍戲舞近幽宮亂山中似途窮綠野堂深門敞獸鋪
銅無限青搖攢峭壁花木老映西東消磨萬事酒千
鍾一襟風鬢霜濛憂國平生堪笑已成翁唯有經綸心
事在承密詔看重重

龜谿集卷三